

DIE LIEFDADIGHEIDSFONDS

Dit is deel van ons Westerse agtergrond om teen die einde van die jaar te begin dink, nie net aan ons eie behoeftes en begeertes nie, maar ook aan dié van andere. Terwyl daar dus hierdie gesteldheid van welwillendheid is, sal dit goed wees om weer eens te skryf oor een van die heel besondere dienste wat die Mediese Vereniging lewer, naamlik, sy werk in verband met die Liefdadigheidsfonds.

Die Liefdadigheidsfonds van die Mediese Vereniging is etlike jare gelede gestig met die doel om 'n trustfonds daar te stel waaruit weduwees en afhanklikes van geneeshere gehelp kan word. Die bedoeling was om 'n aansienlike kapitale bedrag op te bou wat winsgewend belê kon word en waarvan die rente (plus ander gelde soos gereël deur die Vereniging) gebruik kon word om gereelde toelaes aan verdienstelike gevalle van afhanklikes van geneeshere te betaal, waar sulke afhanklikes in 'n onbevredigende finansiële toestand agtergelaat is.

Die manier waarop die fonds op die oomblik geadministreer word, is soos volg: Die kapitale bedrag van die fonds is belê en die jaarlikse rente (plus 'n bedrag van die bydraes wat effens groter is as die bedrag van die rente — kragtens 'n onlangse besluit van die Federale Raad) word elke jaar geneem om toelaes uit te betaal aan persone wat uit die fonds gehelp word. Aanbevelings oor wie toelaes moet ontvang en oor hoe groot die toelaes moet wees, word deur die verskillende Takrade van die Vereniging gedoen, en die Hoofkantoor-komitee van die Federale Raad ken dan die toelaes toe. Elke geval word natuurlik eers deeglik ondersoek ten opsigte van sy behoeftes voordat die toekenning van die toelaag gemaak word. Alhoewel die afhanklikes van afgestorwe lede van die Vereniging voorkeur geniet, word bystand soms ook verleen aan afhanklikes van diegene wat nie lede van die Mediese Vereniging was nie.

Om in staat te wees om soveel hulp as wat nodig mag wees aan soveel begunstigdes moontlik te verleen, is dit natuurlik belangrik om die kapitale bedrag waaruit die fonds bestaan so groot as moontlik te maak. Die vier vernamste inkomstebronne van die Liefdadigheidsfonds is soos volg:

1. *Donasies*. Persone of groepe maak van tyd tot tyd bydraes tot die fonds. Geen bydrae is te klein om welkom te wees nie, want in hierdie opsig is die spreekwoord maar al te waar dat 'alle bietjies help'. Gedurende die laaste aantal jare het die gebruik egter by sommige Takke ontstaan om spesiale pogings aan te wend om aansienlike somme geld vir die Liefdadigheidsfonds bymekaar te maak. Hierdie pogings deur die Takke word gewoonlik deur plaaslike reëlingskomitees gedoen waarop die vrouens van geneeshere en ander belangstellendes dien. Op hierdie manier was dit moontlik vir sommige Takke om, byvoorbeeld, R1,600 of meer op 'n slag tot die fonds by te dra. En met lofwaardige ondernemingsgees het die Suid-Transvaalse

Tak al op meer as een geleentheid die groot som van R5,000 tot die fonds bygedra.

2. *In Memoriam-bydraes*. Die gebruik het by geneeshere ontstaan om by die afsterwe van naasbestaandes of vriende 'n bydrae tot die Liefdadigheidsfonds te stuur in plaas van om kranse te stuur of ander materiële huldeblyke te betoon. In hierdie gevalle word 'n paslik-bewoorde kaartjie van deelneming dan deur die Vereniging namens die bydraer aan die naasbestaandes van die afgestorwene gestuur. Hierdie soort bydraes word nou vir 'n spesiale opvoedingsfonds vir afhanklikes van dokters gebruik.

3. *Bydraes* word ook dikwels aan die Liefdadigheidsfonds gemaak as erkenning van 'dienste gelewer' deur een geneesheer aan 'n ander. Aan die kollega wat die dienste gelewer het, word 'n kaartjie van bedanking gestuur, waarop vermeld word dat sy dienste waardeur word.

4. *Nalatenkappe* vorm 'n welkom bron van inkomste van die Liefdadigheidsfonds en bemakings vir hierdie doel moet sterk aanbeveel word.

Onlangs is op 'n nuwe manier probeer om die inkomste van die fonds te sterk. As gevolg van die inisiatief van mev. E. Gétaz, 'n lid van die Vereniging van Mediese Vrouens van die Tak Kus, Natal, het die geleentheid ontstaan om 'n aansienlike bedrag bymekaar te maak vir die Liefdadigheidsfonds. Die Standard Triumph (Edms.) Bpk. Maatskappy het naamlik 'n Triumph Herald koepee motor geskenk as 'n prys in 'n kompetisie. Die kompetisie is op 'n nasionale basis georganiseer deur die advertensiefirma Lindsay Smithers (Edms.) Bpk.

Ongelukkig was die verloop van hierdie insameling teleurstellend. Die finale bedrag is nog nie beskikbaar nie, maar dit sal veel laer wees as wat verwag was. Miskien was een van die foute wat gemaak is, dat die tydperk van die insameling te kort was — eintlik moes dit oor die Kersseisoen gestrek het. Ook moes daar in die Takke 'n groter persoonlike oproep op individuele geneeshere gemaak gewees het. As elke geneesheer *een hele boekie* geneem het, sou daar onmiddellik 'n baie groot bedrag versamel gewees het.

Ons kan egter tog uit dié ervaring put deur die individuele benadering tog nog te beklemtoon. As elke lid van die Mediese Vereniging jaarliks, saam met die betaling van sy ledegelde, een of twee rand aan die Liefdadigheidsfonds stuur, sal daar dadelik 'n groot inkomste vir die fonds wees.

Die Liefdadigheidsfonds van die Mediese Vereniging is goed bekend aan 'n groot aantal lede van die Vereniging wat tot dusver gereeld donasies en bydraes gegee het. Daar is egter nog baie lede wat nie weet dat so 'n fonds bestaan nie. Daar word besef dat as die aandag van lede op die fonds gevestig word, die gevolg sal wees dat ruimer geleentheid vir die Vereniging geskep sal word om diegene wat bystand nodig het, tot hulp te kom. Met

hierdie doel voor oë het die Vereniging 'n spesiale boekie opgestel (wat min of meer soos 'n tjekboek lyk en dieselfde formaat het). Op die vorms in die boekie kan voornemende bydraers aandui of hulle In Memoriam-bydraes wil maak, of bydraes vir dienste gelewer, en of hulle nalatenskappe aan die Liefdadigheidsfonds wil bemaak. Hierdie boekies kan op navraag van die Sekretaris van die Mediese Vereniging (Posbus 643, Kaapstad) verkry word, en dit sal goed wees om so 'n boekie in 'n laai byderhand te hou sodat dit te eniger tyd beskikbaar kan wees wanneer geneeshere die behoefte mag voel om aan ander hulp te verleen deur bemiddeling van die Vereniging se Liefdadigheidsfonds.

Langs hierdie weg wil ons graag 'n beroep doen op alle individuele lede van die Vereniging en op alle Takke en Afdelings om alles in hul vermoë te doen om hierdie fonds te steun. Daar is 'n groot en dringende behoefte by baie naasbestaandes van geneeshere wat in 'n baie swak finansiële posisie verkeer. Die nood is so groot dat die Komitee wat met die administrasie van die fonds belas is, dikwels nie weet wat om te doen nie. Deur saam te staan om die Liefdadigheidsfonds van die Mediese Vereniging tot so 'n groot en sterk fonds as moontlik op te bou, kan ons in staat gestel word om 'n waardige en edele gebaar te maak aan die nagedagtenis van ons ontslape kollegas.